



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 7

Jude Bellingham season 6 atema  
Real Madrid nung denogo

Qin Gang-i China inyakyim  
nung minprong masütsü ashi

VOL. XX NO. 242 (ADOK 242) DIMAPUR YANGTEPNÜ (THURSDAY) AAMI (JUNE) 15 2023 ₹ 5.00

## Armed Forces-i Cyclone Biparjoy atema renema lir

**New Delhi, June 14, 2023 (Agencies):** Brihostibar nikonngdang Cyclone Biparjoy-i Gujarat kübok Kutch district atongtsü imlar.

Iba dak sendakba nung Bodbarnü Defence Minister Rajnath Singh-i service chiefs asemprong den jembia aser Armed Forces-i cyclone atema renema aliba maparen meyipa reprangshi.

Armed Forces cyclone ajanga tensa bentsür aruba koktettsü atema renema lir ta Rajnath Singh-i ashi.

Gujarat aser Maharashtra relief and rescue operations inyaksü atema National Disaster Response Force (NDRF) telok

33 tashi lemsükja lir. NDRF teams 18 tashi Gujarat nung lemsüktsüogo aser Diu nunga NDRF team ka lir.

Maharashtra nung NDRF teams 14 lemsüktsüba nungi 5 tashi Mumbai nung lir aser tanügbaji standby nung yua lir.

NDRF teams shia nung nübo 35-40 tashi lir aser parnok ket nung tree & pole cutters, electric saws, inflatable boats, basic medicines aser relief items bena lir.

Cyclone Biparjoy ya Gujarat tzükümleni ona arur. India Meteorological Department (IMD)-i June 15 nü Gujarat tzüküm tonga arudang tzunglu kanga arutsü metetdaksüogo.

## Manipur nung nisung 9 tepset; 10 yiru

**Imphal, June 14, 2023 (Agencies):** Bodbarnü Manipur kübok Kangpokpi district nung mejangjatetba nisungtemi Khamenlok yimtsüing amakdang nisung 9 asü aser 10 yiruba osang angazüker.

"Tanep Khamenlok nung atalokba lendong nung nisung 9 tepset aser 10 yirutsü" ta Imphal East SP Shivkanta Singh-i ashi.

Mejangjatetba nisungtemi yimdaklirtem dak injang khaloktsüdang nisung 9 khaser aser 10 yirutsü. Parnokisa iba yimtsüing nung ki aika nung mi senoktsü.

Tanep nisung 9 asüba züingsema Manipur nung May 3 nungi tenzüker tatalokba balala nung nisung 100 tema taküm samaogo.

Maneni, Tamenglong district kübok Gobajang nunga nisung aika yirutsü ta osang ajanga ashi.

Ano, taonung nikonngdang 6:30 ako meta nisung kari Minister Nemcha Kipgen'er ki rongdoktsü.

Iba lendong ya Imphal West kübok Lamphel tesem nung

atalok. Tesüiba ghonda 24 tsüingda Tengenoupal aser Imphal-East district tem nung prangpong-injang 63 tashi ngutetogo.

"Tang tashi nung prangpong 1040, injang 13,601 aser bomb tapu balala 230 tashi ngutetogo" ta Manipur indang security advisor, Kuldiep Singh-i ashi.

May 3, 2023 nungi Manipur nung mepetmesü adokba sülen armouries aser outposts balala nungi prangpong 4000 shi aser injang lakh 5 tema auyaogo.

Iba atema Army, police aser tanga central armed forces-i Manipur nung ayuaba bener aoba prangpong-injangtem meyipa agütsü atema külemi mapa inyaka arur.

Manipur sorkar indang security advisor Kuldiep Singh-isa Imphal West, Imphal East, Thoubal, Bishnupur, Kakching, Pherzawl aser tanga district tem nung curfew mapang ajemba metetdaksü.

Külen Manipur kübok hill districts nungbo curfew ozüing agüja mali, ta pai ashi.

## 50 tourist destination nung Khonoma Village adener

**Kohima, June 14, 2023 (TYO):** India nung 50 tourist destinations rongnung Asia nung mezüingbuba Green Village Khonoma dena lir ta Tourism & Higher Education Minister Temjen Imna Along-i ashi.

Terhotsiese, Khonoma Community Hall nung sentong ka nung jembidang Minister Imna-i "Ministry of Tourism ajanga Khonoma ya India indang 50 tourist destinations nung adentsü shimogo" ta ashi.

Iba osang atema Horticulture and Women Resource Development Minister Salhoutuono Kruse-i Minister Along nem tenüingsang agütsüogo.

February 1, 2023 nü Union Minister for Finance & Corporate Affairs, Nirmala Sitharaman-i Union Budget 2023-24 metetdaksüdang 50 destinations shimtsü aser tourism indang complete package ama renloksü shisema liasü.

## Sen 20 aser tema indang Non-Judicial Stamp Papers angutsü

**Dimapur, Aami/June 14 (TYO):** Sen 20 aser tema indang Non-Judicial Stamp paper tem stock nung lir, koba market nung Vendors tem ajanga angutsü, ta Sr. Treasury Officer, Dimapur ajanga sangdong ka nung metetdaksü.

Anungji Non-Judicial Stamp nungdaker temi Vendors ajanga alitsü akok. Maneni zülua aliba jenjang dang sen timba agi Non-Judicial Stamp paper ayokba metetra Treasury Office mesüra police nem osang agütsüsüla, ta sangdong ajangasa ashi.

## Nagaland Governor-i HSLC & HSSLC toppers nem tenüingsang agütsü



June 14, 2023 nü Raj Bhavan, Kohima nung Governor's Awards 2023 sentong nung Nagaland Governor La Ganesan aser ketdangsurtemi takok anguba kaketshirtem den külemi agiba noksa angur.

**Dimapur, June 14, 2023 (TYO):** Nagaland Governor La Ganesan-i HSLC aser HSSLC Examination 2023 (NBSE) nung Toppers, Rank holders aser achievers nem tenüingsang agütsüogo.

Bodbarnü Raj Bhavan, Kohima nung Governor Ganesan-i sempet agütsüdang "iba ya nisung ajaki tenüingsang agütsüsüba anogo ka lir aser lanurtemi merangba ajanga takok tajung anguba atema tenüingsang agütsür" ta ashi.

"Takok tajung angurtemi pei kibong, school aser loktiliba ajak nüma atangtsüsa mapang ka bentsür aruogo. Parnoki meranga azüingba aser nendaka bushiba ajanga iba takok angu aser parnoki maneni state atema konang bentsür arutsü imlar" ta pai ashi.

"Kaketshirtemi teti nenok ya tarutsü putu ta bilemtsüla aser takok tajung anguba ajanga nenoki nenok kibong, loktiliba,

ajanga Naga nung dang azü tenlaba osang tejangja sangoktsür. Naga nung aikati azü tenlatsü tsübur aser aibelena angateta lir anungji asenoki akokba tashi tangatetba shitakba prokshitsüla" ta lai ashi.

Taküm campaign atema alizüingtem rongnung azü tenlartem dang pelar ta ashitsüba aser nübortem dang maneni azü tenlatsü ajungmesotsü atema lir, ta Dr. Akuo-isa shisem.

"2023 World Blood Donor Day campaign indang yimyim ya 'Give Blood, give plasma, share life, share often' lir aser iba ya taküm piyong azü mesüra plasma nungdakerem asoshi lir" ta Principal Director, DH&FW, Dr. Vibeitounuo M. Sachu-ia ashi.

Education subjects nung takok angurtem, Government School toppers, Eastern Nagaland Students toppers nem Governor awards agütsü. Maneni Governor Excellence Award for Science Study (HSSLC) aser HSLC & HSSLC Toppers nem NBSE Awards agütsü.

Sentong nung Commissioner & Secretary, School Education Kevileno Angami-ia kaketshirtem dang mapang shitak amshitsü aser maneni azüingtsü tayongzüka agütsü.

Sentong nungsa Chumoukedima DC Abhinam IAS aser SP Kohima Imnalensa IPS nati kaketshirtem ayongzüker. Maneni, DBHSS, Dimapur nungi Christy Paul Mathew, THSS, Mokochung nungi Moanola Longchar, CHSS, Dimapur nungi Zahid Ahmed Laskar aser St. JHSS, Dimapur nungi Awang PYimpushu nungeri takok anguba osangtem lemsatop.

Governor Ganesan-i HSLC/HSSLC achievers 62 nem sempet aser kulikakettem agütsü.

Iba sentong nung HSLC/HSSLC Toppers, MILs & Skill

## Nagaland nung World Blood Donor Day among

**Dimapur, June 14, 2023 (TYO):** Bodbarnü Nagaland nung World Blood Donor Day mongogo. Iba sentong ya Health & Family Welfare Directorate nung ayongzüka agi.

Taküm agiba sentong ya Voluntary Blood Donors' Association, Kohima aser Health & Family Welfare Department yaritepa ayongzüker.

"Voluntary blood donation ya shiranger ajak atema tongtipang lir aser talisa Sick cell Anaemia aser Thalassaemia agirtem asoshi kanga tongtipang. Voluntary plasma donation ajanga shirangertemi teyari tulu angur" ta Project Director, NSACS, Dr. Akuo Sorhie-i ashi.

"Iba anogomong amongba ya kanga tongtipang kechiyong iba

meimchir akasodaktsür" ta Commandant Officer, Kohima Battalion (Bn), Assam Rifles (AR), Col.SSB Sharma-ia ojembidangashi.

"Alima nung azü kanga nungdaker aser mapang shitak nung azü tenlaba ajanga nisung taküm aika kümzüker. Tesüiba küm ana tsüingda Kohima Bn, AR nungi azü tenlar 117 liasü aser maneni azü tenladar" ta paisa ashi.

Iba sentong nung Miss Nagaland 2022 Hikali Achumi-i Appreciation of Donors indang shilem agia liasü.

Iba sentong nung Blood Bank NHK, Nagaland State AIDS Control Society, NSBTC, Assam Rifles, RAKTDAAN, Crescent International Hotel, IRCN aser Imprint ajanga yaritepa aser nisung 28-i azü tenla agüja liasü.

"Loktilibang azü tenlaba ajanga

# Mokokchung aser Tuli nung 'World Blood Donor's Day' amung



Mokokchung nung World Blood Donor's Day amungba mapang azü tenlartemi azü tenlaba mapang tangokba noksa nung angur. Mokokchung, 14th June, 2023

**Mokokchung, 14th June (TYO):** Alima ajunga den külemi Mokokchung nunga Blood Bank IMDH Mokokchung, Voluntary Blood Donor's Association Mokokchung, Assam Rifles Mokokchung Battalion, Ex. Service Men League Mokokchung, ECHS Polyclinic Mokokchung aser 25 Nagaland Battalion NCC Mokokchung parnok den yaritepa Zila Sainik Board Mokokchung-i 'World Blood Donor's Day' nungtem taküm omen 'give blood plasma share life often' dak rangloker Hentry Auditorium, 12th Daredevils Mokokchung Battalion, Assam Rifles nung ayongzüka mungogo.

Tanü iba sentong nung special guest Mokokchung ADC, Chumlammo Humtsoe-i jembidang, asenok meimchirtemi kin kidong aser sentsü tapu balala bendanger dangashi, Tsüngremibo asenok ya sakuku yanglu, tetezü nisung

sentsü aser kin balala süaka kati ka nem azü (blood) tenlaba dang masü shimang nungi tenük telen balala tenlateter, ta ashi.

Tagizüker dang nungbo tagütsür temoatsüba ta ashi ama, shirnokisa azü tenlar aser tenla-a arudar, nenok ajak dang pelar, iba tenla yagi nenoki nisung taküm ka kümzükbba nung shilem agirtem lir, ta paisa shisem.

Doctor-temi dang nisung taküm kümzüker masü, saka asenokia azü tenlaba ajanga nisung taküm karbo kümzüktetsü, ta bilema azü tenlaba nung shilem agitsü asoshi special invitee Mokokchung Battalion Assam Rifles nungi Maj. Zeeshan-i ayongzüka metetdaksü.

Mokokchung district nung tang ita nung azü unit 100-150 shi nungdaker saka ita nung azü unit 50-60 dang bendenteter, ya wadang ulura, anungji, Mokokchung district nung azü tenlartem kanga nungdaker, ta

Voluntary Blood Donors Association Mokokchung, tir, Molu Jamir-i 'World Blood Donor's Day' amungba indang lemsatepdang metetdaksü. Mokokchung nung nisung 15-i azü unit kaka tenla.

Iba sentong Havildar Chubameren, Welfare Organizer, Zila Sainik Board Mokokchung menden liasü. Ex. Service Men League Mokokchung tir, Subedar Moatemsü Aier-i tajungshi o jembi aser Zila Sainik Board Mokokchung Secretary, Lieut. Col. Joy Choudhury (veteran)-i melepzüing o lemsatep.

Tuli nunga Modi sorkar küm 9 jungba tenüing nung BJYM 21 Tuli Mandal-i ayongzüka 'World blood Donor's Day' sentong ka CHC Tuli nung ayongzüka liasü. Iba sentong ya Nagaland Fisheries & Aquatic Resources, MLA & Advisor, A. Pangjung Jamiri teyari agüja ayongzü. Tuli nung nisung 22-i azü unit kaka tenla.

# DC Chumoukedima ajanga pensioner dang metetdaksür

**Dimapur, Aami/June 14 (TYO):** Chief Minister Health Insurance Scheme (CMHIS) registration aser Card Generation of Pensioners dak sendakba nung Deputy Commissioner, Chumoukedima ajanga sangdong ka nung ashiba agi, Chumoukedima district kübok pensioner ajak CMHIS

nung tenüing zülüoktsü. Pensioner temi June 26, 2023 nungi July 7, 2023 tsüingta item documents bener registration center bushia arutsüla:  
1. PPO parts 1,2 & 3 (Photocopy)  
2. Applicant indang Birth Certificate & Aadhar card aser pa/ la dependents (Photocopy).

# DC Longleng-i NH-702 nung mesenzüi atatsü metetdaksü

**Dimapur, Aami/June 14 (TYO):** Changtongya nungi Longleng tsütsü kilometre ana shi orr NH-702 nung long anenzüka aluba ajanga gari senzüsempingba nung timtem ajurua aliba ali aser long indoktsü atema tarutsü nung sangdong ka

magütsü tashi iba lenmang nung gari aser nisung senzüba ajak anena atatsü, ta Deputy Commissioner, Longleng ajanga sangdong ka nung metetdaksü. Iba totuyuba ya June 13, 2023 nü nungi alitsü, ta sangdong ajanga ashi.

# Advisor Hekani-i Mokokchung semdang



**Dimapur, Aami/June 14 (TYO):** Advisor Industries & Commerce, Hekani Jakhalu aser Director, Industries & Commerce, A. Temjen Jamir den Department ketdangsür temi June 8 aser 9 anogotem Mokokchung District semdanga industry atema ki o jen teyangludak aliba tesemtem asadanga jaja liasü.

ajanga local entrepreneurs temi factory lapoktetsü aser district nung business tasen tenzüka mapa adokdaksütsü, ta lai ashi. Parnoki iba mapang Longnak nung Modern Aggregation Centre, Tuli nung Industrial Estate, Yaongyimsen nung CFC Food Processing aser Changtongya nung Modern Aggregation Centre tem semdanga liasü.

Ketdangsürtem rongnung NIDC Chairman, Kvulo Lorin aser NIDC nungi ketdangsürtem dena liasü.

Item ki o jen yagi business tasen tenzüksü asoshi maongka agütsütsü aser state nung logistic sector ainba nung yaritsü.

Project tem kanga junga renloka aoba ngua Advisor Hekani temolung asü aser mapang shidak nung project tembangtsü nenshia ashi.

Advisor Hekani Jakhalu-i Mokokchung district semdangba ya state nung industry tsütsü 'holistic ecosystem' adokdaksütsü nükjidong nung lir.

Nüburtem amshitsü atema ki o jen ya yanglur aser iba ya

# Mkg. nung Portable Liquid Nitrogen Plant kol amenok



Mokokchung nung Portable Liquid Nitrogen Plant, Animal Husbandary & Veterinary Services nung Commissioner & Secretary Wb.Vikeyie Kenya IAS-i (tejaklen tabelen nungi pezübuba) lapoktsür kelen dept. nung tekolaktem aser Chief Veterinary Officer Mkg. den staff-tem tangokba noksa.

**Mokokchung, Aami/ June 14 (TYO):** Veterinary Hospital Complex Yimyu Ward Mokokchung nung June 14 nü National Livestock Development Board (NLDB) sentong kübok Portable Liquid Nitrogen Plant, Animal Husbandary & Veterinary Services nung Commissioner & Secretary Wb.Vikeyie Kenya IAS-i lapoktsüogo.

Portable Liquid Nitrogen Plant ya shiruru takum yangluba mesen rizüingba kol ka lir, iba kol ya National Livestock Development Board (NLDB) sentong kübok Nagaland nungbo Mokokchung district-i mezüingbuba agizüka amenoker.

Animal Husbandary & Veterinary Services nung Commissioner & Secretary Wb.Vikeyie Kenya IAS-i iba Portable Liquid Nitrogen Plant lapoktsür kelen mapang tatsüka agia jembidang Animal Husbandary & Veterinary Services department ya department rongnung tejentiba ka lir aser iba department yagi nübur nungtakba aika inyaka

yariteter, anungji tanu Mokokchung nung Portable Liquid Nitrogen Plant amenokba ya Mokokchung asoshi dang inyaka tajangzü. agitsü masu saka temeket aliba district nema teyari agujangta ashi.

Paisa nübur ajangzükdaksütsü asoshi sorkari sentong tajung aika tenzüker, tetenzükdangbo kanga junga tenzüker saka mapang tatsüka dang sürbo tajangzü. ngua meinyaker, aji asünung iba sentong nung yabo ibala mesükbaji mataloki nübur tsüratema ajangzüksüsa department nung inyakertemi iba kol amshia inyanganta ajungshia ashi.

Iba kol ya tajangzü. bushitsübaren nung mamshitsüla saka nüburtem tajangzü. ngudaksütsü asoshi kanga dang kumdanga amshitsüla aser nentaka inyanganta paisa ashi.

Wb.Vikeyie Kenya IAS-isa ano olen ka nung nuburtemi pei takum anema alitsü asoshi mozü mora mamshiba aonsotsütem bushia achir, aonsotsü aser chiyungtsü tapu balala aika asoshi nashi scü(cow dung) kang

dang junger, anungji nüburtemi nashi scü amshia aonsotsü aser chiyungtsütem anepalua meitetdaksütsü asoshi department-i nüburtem nem tapet tesayuba agutsütsü kangasa nungtakerta ashi.

Iba sentong nung A.H & Vety.Services Joint Director Dr.K.Gwirie, NLDB Managing Director Dr.Achila Ao aser NLDP Project Director Dr.Keweledo Mero nungeria shilem agia jembiba den Chief Veterinary Officer Mokokchung Dr.B.M.Sunep ketdangsüba nung iba sentong agi.

Mokokchung nung Portable Liquid Nitrogen Plant amenokba ya ajanga nüburtem shiruru metsütsü asoshi tajangzü. agitetsüsa, iba kol nung litre 40 bo rizünga yutetsü, department-i tajungtiba inyaktsü, Mokokchung district peria agiba dang masu saka temeket aliba district-tem nema teyari agutsütetsü inyaktsü tebilemba lirta Chief Veterinary Officer Mokokchung Dr.B.M.Sunep-i Mokokchung nung osang zülurtem den jembidang ashi.

# Old Ministers Hill Panchayat ajanga kilentzü aoba lenmang müreksü metetdaksü

**Dimapur, Aami/June 14 (TYO):** Old Ministers Hill Panchayat ajanga taoba mapang metetdaksüba ama, colony nung 'drains/culverts' nung tzü abenba pipe tem agi kilentzü aoba lenmang nung tenokdangba agüja aliba müreksü nenshia metetdaksü.

mera agitsüla.  
3. Panchayat ketdangsüri ashiba angatsüla aser nüburtem ajunga asoshi temeket müreka ayuba maparen nung shilem agitsüla.

Taoba mapanga item tesemtem müreksü totuyuba agüjaka pipe tem agi kilentzü aoba lenmang nung maneni timtem agüja nüburtem temang anema alitsü asoshi timtem agütsür.

Iba totuyuba sülen manidaker nem Old Ministers Hill Panchayat ajanga anogo süyiba sülen tapet temerenshi agitsü, aser iba mapang tzü abenba pipe tem agientsütsü mesüra indoktsütsü, ta sangdong ajanga ashi.


Meyi arur asünung, kilentzü aoba lenmang müreksü aser tzunglu tzü aser kilentzü tetsükdaksü makai yimdaksütsü ya tongtipang lir. Anungji PHE/private nungi tzü agirtemi iba sangdong agütsüba anogo nungi tenzüka anogo 30 tsüingta item totuyuba sülen anidaktsü metetdaksür, ta Old Ministers Hill Panchayat ajanga ashi.

Old Ministers Hill Panchayat ajanga nüburtem anema alitsü asoshi temolung agütsür aser colony nung alirtem mesüra anasa aliba colony nung alirtem dang mürekmejuba maparen nung temolung agütsütsü ayongzüker, ta sangdong ajanga ashi.

1. Colony nung tang drains/culvert nokdanga aliba tzü pipe ajak agientsü.  
2. Tzunglu tzü aser kilentzü junga meyimtetsüsa tetsükdaksü agütsüba ajak agientsü asoshi nungdakba

Tzü atsüingtetba, tashidak adokdaksüba aser timtem balala nungi jenbua alitsü asoshi kilentzü menokdangi yimdaksütsü tim. Iba dak sendakba nung tali jangshitsü asoshi Old Ministers Hill Panchayat züingsem den tongteprateptsü akok, ta sangdong ajanga ashi.

# Tanü Biparjoy cyclone agi Gujarat kübok Kutch kongshitsü



Kutch (Gujarat), June 14, 2023: Biparjoy cyclone agi Kutch district kongshitsü anogo ka dang lia tzyüimkümlen tang teyangludak rong ka süng agi peria metanga aliba noksa nung angur.

**Rajkot/New Delhi, June 14 (Agencies):** Brihostibarnü 'Biparjoy' ta ajaba cyclone yipru tesashi agi Gujarat nung tzyüimkümlen aliba Saurashtra aser Kutch districts kongshitsü; Brihostibar nikongdang iba yipru ya Jakhau nung aliba tzyüküm atongtsü, aser iba mapang nungji mopung ghonda ka nung kilometer 150 tashi keraa aontsü.

Ketdangsertemi Mongolbar tashi nung nisung 30,000 dak tema aienshidakja shelter homes nung jenokdaksüogo aser kümzüka maparen inyaksü atema NDRF aser army den agency balala nungi sepaitem jenti yoka lir.

Biparjoy ta ajaba yipru ya June 6 nü Arabian Sea nung kümteta liasü aser anogo 10 jungnüa Arabian Sea nung aliba sülen Brihostibarnü Gujarat kübok Kutch tzyüimkümlen atongtsü.

Amongnü India Meteorological Department (IMD)-i, iba yipru ya June 15 anügdang Gujarat nung Kutch district kübok Mandvi aser Pakistan kübok Karachi tsüingda tzyüimkümlen atongtsü, ta metetdakja liasü.

Biparjoy cyclone agi tzyüküm matongyonga iba cyclone ajanga yipru lendong nung balala nung ano nisung ana süogo aser tang tashi nungbo ajak senteper nisung pongu süogo.

India Meteorological Department-i sangdong ka ajanga, northeastern Arabian Sea nung iba cyclone kanga sashia aliba nungi terabo tashi meiti kümogo, ajisüaka iba

cyclone ajanga teraksatsüba tulu alitsüa akok, ta metetdaksü.

IMD tongti, Mrutyunjay Mohapatra-i, iba cyclone ajanga Kutch, Devbhumi Dwarka, Jamnagar aser Porbandar kübok tesem aika nung tzyüinglu kanga sashia (20cm dak tema) arutsü, ta ashi.

Tsüingsang-mopung kanga majungba ajanga Gujarat nung ano nisung ana süogo. Belgam nung aliba factory ka nung mokozü aoba tesem chirepba lendong nung Madhya Pradesh nungi tetsür ka asü. Ano tanga tatalokba ka nung Porbandar nung ki ka chirepba lendong arrshi küm 35 tebur ka, Naran Lodhar süogo.

Cyclone lendong nungi kümzüksü atema sorkar ketdangsertemi nisung 30,000 dak tema aienshidaksüogo; Kutch nungi nisung 14,088 aienshidaksü, Devbhumi Dwarka nungi nisung 5,000, Rajkot nungi 4,000, Morbi nungi 2,000, Jamnagar nungi 1,500, Porbandar nungi 550 aser Junagadh district nungi nsung 500 dak tema aienshidaksüogo.

Parnok rongnung nisung 284 bo mashisa tetsürtem lir, ta Bodhbarnü state relief commissioner, Alok Kumar Pandey-i metetdaksü.

Kutch administration ketdangsertemi, tensa apir Bodhbarnüa tzyüimkümlen nungi kilometer 5-10 tsüingda telongtet nung alir nisung 7,278 aienshidaksüogo, ta metetdaksü.

1998 küm Kandla cyclone ajanga yipru mopung ghonda ka

nung kilometer 165 tashi kera ona liasü aser iba lendong nungji nisung 10,000 shi asü.

IMD tongti, Mohapatra-i, "Tzyüimkümlen lendong ataloktsüa akok. Item tesem nung tzyüinglu cm 25 tashi aru nunga onoki kecha mesüingmangtsü. Teti agia tang mongpu nung item tesem nungji tzyüinglu iba tashijibo marur, anungji ali nemzüka aliba tesemtem nung tzyüimkümlen atongtsü, ta metetdaksü.

"Iba cyclone agi tzyüimkümlen atongdang yipruji kanga tesashi asütsü aser teraksatsüba tulu alitsüa akok. Tzyüim nung tzyüsem metre 6 tashi atutsüa akok, aser ibaji ajanga Saurashtra aser Kutch nung ali nemzüka aliba tesemtem nung tzyüimkümlen atongtsü, ta metetdaksü.

Bodhbarnü IMD-i, "States aser union territories (UTs) 9 nem tekümdangtsü metetdaksüogo aser item states den union territories ji Gujarat, Kerala, Tamil Nadu, Karnataka, Maharashtra, Goa, Daman & Diu, Lakshadweep aser Dadra & Nagar Haveli lir," ta metetdaksü.

June 14-15 anogotem nungi Gujarat tesem aika nung tzyüinglu kanga sashia arutsü aser June 16 nü Rajasthan nunga tzyüinglu sashia arutsü.

Talisa Gujarat kübok Porbandar, Rajkot, Morbi aser Junagarh districts nung tzyüinglu kanga sashia arutsü aser June 15 nü Saurashtra aser north Gujarat region kübok tanüingba district tem nunga tzyüinglu sashia arutsü, ta IMD-i metetdaksü.



June 14, 2023 nü New Delhi nung Delhi Chief Minister, Arvind Kejriwal den Communist Party of India (CPI) General Secretary D. Raja aser CPI National Secretary K. Narayana nung senden ka amenba sülen tangokba noksa nung angur.

# London nung Brazil nunger kati India tsür ka kotari agi tsüingset

**Hyderabad, June 14 (Agencies):** London nung Brazil nunger tebur kati Hyderabad yimti nungi India tsür ka kotari agi tsüingsetogo.

Tetsüralaji London nung lar kidang lia teburasang jagi la tsüingset, ta osang ka ajanga metetdaksü.

Tetsüralaji Hyderabad kübok Champapet nungi, Kontham Tejaswini Reddy liasü ta jangjaogo aser la London nung Wembley kübok Neeld Crescent nung lar medemtsürtem den telidak liasü.

Police-i, Brazil nunger tebur kati Reddy den lar medemtsürta na kotari amshia amak, iba sülen Reddy kanga mejungi yirua meküzmükteti asü saka lar medemtsür labo tera dang yiru, ta metetdaksü.

La tepsetba dak sendakba nung Police-i tebur ana puogo.

Tamalen Metropolitan Police-i Brazil nunger Keven Antonio Lourenco De Morais noksa prokshia pa apuba nung yariteptsü mepishia liasü, iba sülen Neeld Crescent anasa Harrow nung arrshi küm 23, Keven puogo.

"Police densema London Ambulance Service nung tetsür anaprongla treatment agi. Emergency services tajung agütsüyonga arrshi küm 27 tetsüralaji meküzmükteti iba tesem nungjisa asü. Lar kinüingertem nem iba osang metetdaksüogo," ta police-i sangdong ka nung metetdaksü.

Tejaswini Reddy'er kibong züingsemtemji Hyderabad kübok Hayathnagar area nung alir.



Tejaswini Reddy

Osangbener den jembidang Reddy tebuti, "Onoki iba tatalokba osang tanep angashiogo, ajisüaka ibaji kodanga atalokar memetet. La yirur kanga mejungi hospital nung lir ta onok nem osang metetdakja liasü," ta ashi.

Küm asem tejaklen Tejaswini Reddy London-i aoba sülen yangji Master of Science course renemer liasü, ta tebusia metetdaksü.

Yaküm August ita nung la Hyderabad-i aru aser September ita nung London-i meyipa ao. La taküm May ita nung Hyderabad-i arutsü sentong liasü saka maru.

Tebuisa, "Onoki la kibong kümdaksütsü sentong yanglua liasü. Sentong ajak renemba sülen la arutsü ta lai ashi. Lai la teinyakdak mapa nungi sodi meshiogo saka ano ita ka mapa inyaker meyipa arutsü ta onok nem metetdaksür liasü," ta metetdaksü.

Lar kinüingertemi sorkar dang la tasümgang UK nungi Hyderabad tonga bener arutsü atema yaridaktsüner, ta mepishiogo.



New Delhi, June 14, 2023: World Blood Donor Day anogomong nung New Delhi nung aliba RML Hospital nung security sepaitemi azü tenla agütsüdang tangokba noksa nung angur.

# Delhi Police-i Brij Bhushan kümzüker: JMM

**Ranchi, June 14 (Agencies):** JMM party-i Delhi Police-i Brij Bhushan Singh anema shidak meinyaker ta aitsüba den külemi, Centre sorkari Wrestling Federation of India (WFI) tongti, Brij Bhushan Sharan Singh kümzüker, ta aitsü.

Jharkhand Mukti Morcha (JMM)-isa, Delhi Police-i Brij Bhushan Sharan Singh kümzüka ayutsü meranger aser pa anema bushisüingdangba maparen kanga mezülongi inyaker, ta aitsü.

JMM general secretary, Supriyo Bhattacharya-i, "Delhi Police-i Union sorkar tetuyuba kübok inyaker," ta aitsü.

JMM lenirisa police-i longkak aiter wrestlers dang kuli

meshiba atema aitsü.

JMM leniri, "Tim mesüi kongshiba ajanga takoksa angurtemi komaser electronic kuli agütsütetsü? Timtem ajangshiba mapang nung koma ser la teka nung camera alitsü?" ta asüingdang.

Olympics nung takok angurtem densema India nunger wrestlers aikati WFI tongti, Brij Bhushan Singh-i tetsür tanur wrestler ka densema tetsür aika dak tim mesüi kongshiogo, ta tai tonglokja pa aputsü takhangba agütsür.

Ajisüaka Kaiserganj nungi BJP MP, Brij Bhushan Singh-ibo pa anema tai tongloktsüba ajakji tiyazü aser iba ya yimtenren tsütsülen nungi lir, ta ashir.



## TIR YIMYIM YIMOBILEM (EDITORIAL)

DIMAPUR YANGTEPNÜ, AAMI (JUNE) 15, 2023

### Tai apur alitsüla!

**Y**imten mapa nungi shir ki mapa tashi nung shitak inyaksü atema tai apur alitsüla. Iba amaji ka mesüra shitak inyaka-inyaka shitak inyakertemia meshitak inyak tenzüksü. Nisungji yamaji lir. Aji oda, shiruru ama nisunga tanüker alitsüla. Tanü Nagaland nung tebilemstüji tai inyakerbo onsara saka tai apurbo kata mali. Iba jagi Nagaland nungbo tai aputsü aser ochimashi mapatem anema inyaksü asoshi tentetba department aser ita sen agüja ayuba ketdangsertem ali mali memeteter. Atangji, tai apurbo nungji nungsen lir aser kijabo akoksatsüa akok saka nübertembo ajangzüksü. Iba ama tensa mapang ka nung Nagaland nung telok tentet tasen ka tenüng agi Nagaland Transparency, Public Rights Advocacy & Direct Action Organisation (NTPRADO)-i Nagaland nung Rural Development nung ketdangsertemi yimyaklir ki meyanglutettertem asoshi ki yanglutsü atema center government nungi senotsü yokba sen crore 74 tashi mashi amshio go ta tai tonglokja tai apurbo mapaji, RD purtemi shitak inyaka liang teli, nübertem tenük lapokja arüsangoktsüba mapa ka asütsü. Atangji, tanü asungbo akhi inyakyim ama masü saka center government nungi yokba senotsü teyari ya state government senpong nung enoktsür masü saka teyari angur (beneficiary) senpongi indangindanga aier, anungji len tom nung ketdangsertemi agizüka magitettsü. Ajisüaka, alima nung nisung dang inyaker asünungji ochimashi inyakerntem asoshibo lenmang aisü lapoka lir. Anungji, koba sentong aser mapa nung südirsüaka sen shitak agizüka agir magi ta asübjaja tongtibang saka ano tongtibangtibaji mapaji shitak inyaker meinyak ta asübjaja asütsü. NTPRADO-i Nagaland RD nung inyakerntem karbo tenüngteta kanga mejungi aija lir. Aji oda, parnok ai tsüba ama aibelena lira temzüng ozüng nung aliba ama nübertem ashio kja ochimashi mapa inyakba atema tapet temerenshi agütsütsü tim. Iba ama temerenshi jagi temerenshi angurtemji dang masü saka tang aser tarutsü nung inyaksür purtem kümdangshidaktsütsü. Alima nung temelenshi tajungji iba amaji, tejak mereprangi, aibelener nembo tapet temerenshi agütsüba mapa nungi tenzüker. Ajisüaka, tai maket ser nung NTPRADO-i yimjak nung nisung maksüja aitsüba maparenang ka süra, memenui RD nung ketdangsertemi nübertem atema kiojen yanglutsüba kuli tejangja bener NTPRADO-i aitsüba o ji aija metetdaksütsü tim. Tanü asungbo nisung kati mesüra telok kati yimjak nung aitsübjaji tapi toktsütsüla masü, kechiyong iba o aser noksaji internet ajanga alima asünger aser social media nung kasaji teti alitsü, anungji pei chirnur aser semchirse mnurtemi item tatalokbatemji reprangtsü. Atangji, NTPRADO-i RD ketdangsertemi ochimashi mapa inyak ta tonglokja aitsübjaji aija Nagaland State Village Development Board Association-i metetdaksüo go. Ajisüaka, nübertem iba o nungji mamanger, anungji RD ketdangsertem bang nungi iba oji adoktsüla. Idangji dang nübertemia angatetsü aser amangtsü. Democracy yimten junger ta asübjaji tanga yimten yimli ama masü saka democratic yimli nungbo nübertem pei bilemba sademsadema shitetba dang masü saka government nung inyakerntem tai inyakba anema ola adoktsü akoker. Ajisüaka, asen lima nung tia majung kaji, asenok nem government tai aputsü tashi temeten agüja lir ser nung, iba temetenji kija kibong aser lokti tentettem ajaki yoka achiba agi ola madoktet, asen lima nungbo nüchibo shinga mali ama tai aser ochimashi anema ola mali kümogo. Atangji, kija kibonga sang mesüra lokti tentettema sang takar aliba agi alir, anungji takartem ochimashi aser meshitak inyakba anema parnok teyari agia alirtemi ola adoktsüji tasak. Ajisüaka, pei lima aser nübertem jenjang tajungba kümdaktsütsü asoshi kija aser lokti lenirtemi machimajemang aser makamaitang khen aremer, ochiba lima aser ochiba yimten ka asoshi nungsen aser takoksa arema ola adoktsü tim. Telokbo aika tenteta ayu saka telok ajak ochimashiba sen agidang totzü enoker lokti mapa inyaka jajatsüla dang süra, atangji, shibaibo shiba tai aputsü ?

## OLEMSABANG

### YI AJEMBA TAJANGZÜK ANGUBA ASER TERAKSA ADOKDAKTSÜBA INDANG TATSÜKA LEMSATEPER

~ R. Imkong Lkr, Aolijen Mepu (Unmga)  
Mokokchung

Tamasa yangi yi ajemba indang tenzüka maodang asen Ao oshi (Dialect) nung ojang olasü (accent) kar meshidaki jembiba aser züluba ngua temulung tera masüba olen ka tazünger ajak den lemsateper. Kechiba ta süra asen Aortemi oshi (sub-dialect) tapu ana jembir, Jungli oshi aser Mongsen oshi, iba telok ana ya anogoshia (saka anogo shia ta mamshitsüla) külemi tang liyonga jembiyonga aor asünungji telok ana ya khen agi tepila majung. Saka karibo paper nung züludang memetetika aibelena zülur aliba angur. Yamaji karibo pei metetbaji mesüra bilembaji tang shitakba olasü ta bilemba nisung kar lir, item amala nisung jagi asen Ao oshi takar aliba ya kanga mejungi raksatsür ta nibo aibensa bilemdanger, aser item amala jagi ojang kar meshidaki zülutsüba mesüra jembiba ajanga asen Ao oshi ya tepur mejungi kümdaktsür ta metettsüla. Item mesükba ojangtemji Laishiba nunga tesem kar nungbo zülua angur. Iba mesükba ojangtemji kar yangi tuteta sayuner.

Tatishitsü agi kelen ta zülutsü melena külen ta kari zülura iba ojangji aibelenba ojang ka ta angatetsüla, kechiba ta süra kelen tetezüjibo iba sülenji ta jembiba oren nungang amshir ta metettsüla. Tanabuba nung külen ojang tetezüjibo ayongküm külenji mesüra iba tesem ser külenji ta asüba oren nung tang amshir ta metettsüla. Tasembuba nung zülujang 'T' agi tenzüka ojang ka tatishitsü agi ni tang arutsü ta asüba ojangji, ni dang arutsü ta kari zülura dang olajibo (drum) asüm atemdang dang dang ta ola adokba 'sound' mesüka adoker ta metettsüla. Pezübuba nung ano karibo temeshi Laishiba nung Kodak (heaven) indang züludang kotak ta amshia züluba angur, kodang kotak ta züludir olasüji (accent) tekalen saketa atur, saka Kodak olajibo tetsünglangleni züngzüka alur ta zülujang 'T' aser 'D' jagi bendanga sayur ta metetdi. Aji oda ojang tetezütemji tesem kar nung zülujang ka tera melenshi nung tetetzü joko balaka akümer ta metetdi. Anungji tarutsü mapangtem nungibo asen Ao oshi ya jangja jangja mera ket keta zülutsü ajak dangi mepishia zülur. Yamaji English oshi nunga kari Mother tongue ta zülutsü melena mother dung ta zülura tetezüji temenünütsüka asütsü, aser ano kari card ta zülutsü melena cart ta zülura iba tetezüjia temenünütsüka asütsü ta metetdi.

Tang ano yi ajemba Ocet 'Topic' dangi meyipdi. Yi ajemba ya asen tetsü tebou mapang nungi asen lima nung chia jema aru ta otsü-i ashir, aser iba chiyungtsü jagi taküm libaliro aser tensa mapang ajak tizükteta liyonga aru ta otsü-i ashir. Tongtibangsa asen tetsü aser tebou mapang nung pei tebok mesütsü atema alu inyaki aotang yi ya chi melena chia jemasa aru ta otsü-i ashir.

Tamasa yi ya komasa yanglua chia jema aru iba indang tatsü agi lemsateper. Yi yangluba ya tamasa chi sürua mekongga ayutsü, aser iba sülenji piyazü (yi mozüji) chi sürua akaba yariji jungjunga menüngsar enoktsü, aser po ka nung tekübangtsü (lid) agi nembanga ayutsü. Iba ama renemer ayuba ya mei mapang (during summer season) nungbo anogo asem mesüra pezü tsungda nung teronem tanang tu adoka alitsü, idangji po nung jagi kota tila ka agi mejemtzü atsüngtena aliba tu tera lenteta ajung majung tendanga jemdangtsü, aser piya chi tua ajung majung tendanga chisang agi tilaka keteta chidangtsü, aser yi junga kümadoker lira chikümong (like a small jar made of bamboo rope) ka nung amchi am tajem tulu ana mesüra asem tamasa lemoka ayutsü, iba sülenji piya chi aser mejemtzü tanang meyokteper aliba tu chikok aser chisang agi kenteta chikümong nungji tuluka enoker tekübangtsü (lid) ka agi nembanger aluleni bener aor. Aser alu mapa meranga inayker kelen alu jen bushia oagi chikümong tu lapoka piya chi nung tu tzü talem tera shioka aisar ajemer. Iba piya chi achiba aser ajemba ajanga parnok temang nung tashi tasen angur, aser iba chiyungtsüji chi melena chia ajemer aser alu nung ayiper. Iba ama alu nung ayipdang tanü mapang amai mosquito net maliba mapang ka asü nungji merila aika arua aonung meteper, aser meyim (poison) enoka doktsür oadoker. Saka parnok temang nungji (alcohol) yi mozü tesashi peria aliba ajanga parnok meshirangi junga tang lia aru ta otsü jembia aru.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

### South India nung Arogo kati Manipur nung kaketshirtem yaritsü



June 12, 2023 nü Banglaore nung tongti putir, Peter Machado-i Manipur nungi kaketshir 70 shi ajurua jembidang tangokba noksa nung angur.

**June 14, 2023:** South India nung Arogo kati Manipur state nung college aser school azüngertem taküm tanaben asentenshiba nung yaritsü melungtetogo.

June 12, 2023 nü Karnataka kübok Banglaore nung tongti putir, Peter Machado-i Manipur state nungi kaketshir 70 shi Arogo indang pastoral center nung agizüka liasü.

Iba sentong nungji jembidang Peter Machado-i Manipur nungi kaketshirtem dang, "Onoki lenla ajak tsütsülen nungi nenok nem teyari agütsütsü," ta metetdaksü.

Manipur nungi kaketshirtem melung süngzükja Machado-isa parnok dang, Arogoi ketdangsüba rejutem nung nenoki angati azüngtsü akok, ta metetdaksü.

Machado-isa, Manipur nung rara ajanga prokshia alirtem den tejashi lemsateper aser Arogoi parnok yaritsü melunga lir, ta metetdaksü.

June 14 nü osangbener den jembidang Arogo nung otongdar, JA Kantharaj-i, "Kaketshirtemi timtem balala lemsatepbaji Arogo leniri (Machado) nendak-nendaka anga, aser pai parnok (kaketshirtem) dang, nenok taküm tanaben asentenshi yangershiba nung ni nenok yaritsü melunga lir ta shiogo," ta metetdaksü.

"Tensa tajungba maküm tashi parnok yaritsü ta pai shiogo," ta Kantharaj-i metetdaksü.

India tesem balala nung Khristantem anema inyakba nokdangtsü asoshi Supreme Court nem temepishiba ken o ka agütsüba nung Peter Machado-a densema lir.

Bengaluru nung azünger Manipur nungi kaketshirtemji Jesuit putir, James Beipei-i meina liasü.

Ita ka jungnüa Manipur nung rara adokba metetdaksü dang Beipei-i, "Rara ajanga tekülem kitem, rejutem aser ki aika raksaogo," ta metetdaksü.

Manipur nung ano maneni June 13 nü rara adokdang

Imphal East district nung nisung 11 süogo, ta state police-i metetdaksü.

Iba dak alia nisung aika yirua sorkar aser nija hospital balala nung mongdar.

Taküm May 3 nü Manipur nung lisopur Kuki aser Meitei tsüngda rara adok aser nisung aika asüba den külemi kiojen jenti raksaogo.

Kuki nung teimbaka Khristantem lir aser Meitei nung teimbaka Hindu nung lir, ajisüaka Meitei nungera karbo Khristan lir.

Manipur nung nütsüng million 3.2 lir aser nütsüng shilem 53 bo Meitei nung lir.

Meitei nungertem Scheduled Tribe (ST) nung züngoktsü asoshi takhangba agütsüba anema All Tribal Students' Union, Manipur

(ATSUM) lenisüba kübok longkak aيتدang Manipur nung azüdokshi lendong tulu adoka liasü.

Iba tatalokba sülen United Christian Forum of NEI-i sangdong ka ajanga Manipur tensa atema süoki ia bilemstsüba aser shisabuluba lemsatepa liasü. United Christian Forum of NEI ya India indang North Eastern Region nung Khristanpur asoshi nokdakba tentet ka lir.

UCF dak alia Khasi Jaintia Church Leaders' Forum (KJCLF), Baptist Churches Union of India (BCUI), Zeliangrong Baptist Churches Council North East India (ZBCCNEI) aser Oriental Theological Seminary, Nagaland densema telok aikati ita tatalokba aija liasü.

### South Korea aser Japan nung pastor tem tsüngda amalitepa inyaktsü



June 06, 2023 nü Incheon yimti nung South Korea nungi tongti putir, John Baptist Jung Shin-chul-i (ajichilen) Japan nung putirtem telok ka den jembidang tangokba noksa nung angur.

**June 14, 2023:** Tawa Japan nungi putirtem telok anati South Korea nung Arogotem semdangogo; linük ana nung aliba Arogotem aser pastor tem tsüngda amalitepa inyakba jenjang tashi itshitsü nükjidong nung parnoki South Korea semdang.

Japan kübok Fukuoka Arogo nungi putirtem aser Spain nung tongti putir, Josep Maria Abella Batlle nungeri June 5 nungi June 9 tashi South Korea kübok Incheon semdang.

Japan nung putirtemji Social Pastoral Center of Incheon Diocese nung training ka nung aden aser June 6 nü parnoki South Korea nung Arogo lenirtem den senden mena pastoral mapa balala

onüktem nung o lemtepa liasü.

Senden nungji Arogo anaprongla nungi putirtemi oshi tsütsülen nungi tetsükdaksü liaka pastor tem tsüngda amalitepa jenjang tashi itshitsü atema bangjemogo.

Iba senden jakdang Japan nungi putirtem tekülem sentong nung aden; iba sentongji Incheon nung Bishop John Baptist Jung Shin-chul leniba nung agi.

Japan nungi putirtemisa Dapdong Catholic Tenla ki aser Incheon Diocese History Museum semdanga liasü.

Bishop Jung-i Bishop Abella nem Korean Virgin Mary kürakyanglu aser Khrista atema asür ka indang kürakyanglu sempet agütsü.

### ANOGO ABEN TSÜNGREM DEN

#### Khristan tekülem

#### Mathi 4:1-11

Yihuda nung yimsü nung lenir tulu kati Yihuda nung aser khristantem kasa tekülem nung tajangzük anguba ajitetba ka yamai ashi: "Nisungi Tsüngrem indang bilema malitsü akok, saka Tsüngremi nisung atema kanga bilemstsür". Ibai bushitettsü tatempangba lemgaji tekülebaji lir kechiaser tekülebaji taküm aliba lemgang ka lir. Tsüngrem tesangwa nung alimaji anguba lemgang ka.

Koba yimya nung chichiba Khristan tekülem yimyaji sayur? Putu ajak nung, mapa ana maneni külemi alir. Itemji sayutsüngiba aser oji angashiba, aser Kibuba Benjung agiba. Parnok inyakba yimya balala süaka, ka jembir aser ka mapa agi sayur, saka itemji mapabo kasadang. Anapronglai Khristai alangzükba taochi osangtajung ain aser sentsüwangshi nung sangdonger.

Anungji ozüngji odang lir. "Nai Kibuba ne Tsüngrem külemang". Kechiba? Tekülemji Khristan kija takümi Tsüngrem yimli nung shilem agia adenba lir. O ka nung, yangi asen tekülemji, kotak nung külemba tashi mait ongmedang dang lir.

Itemi shisadangang: Tang nai Tsüngrem mebilemer mesüra shinga mebilemer ta bilemer asü? Iba tebilemstsü aneptsü asoshi nai kechi merangdang? Tembarten den jembir asü? Counselors den jembir asü? Tsüngrem den jembitsü koda? Ne taküm nung tekülem nem mapang agüja ali asü mali?

Sarasadem: Kü tanela nok nungi kümzükang, kü taküm azü tashi nungi kümzükang. Molusongzü bang nungi kümzükang; arem nashi pungchi nungi Nai kümzükang.

Telangzüba: Aser tesüneptsüba Tsüngremi nenok tetsüng kübok Satan ajemshitsü.

Bishop Pius Moon Chang-woo den senden amen aser iba Arogo puti otsü jembiba den külemi 2005 küm nungi tenzüka Jeju Arogo aser Kyoto Diocese na tsüngda amalitepa inyakba süoka jembi.

Iba mapang nungjagi tenzüka Kyoto Arogoi temeshi aini aoertem Jenu nung aliba Blessed Virgin Mary shrine-i yoker aser Jeju Arogo nungi lanurtemia Kyoto Arogoi ayongzükba Hiroshima Peace Camp nung shilem agia arudar.

Coronavirus wara mapang nungbo Japan aser South Korea Arogotem tsüngda amalitepa inyakba maparen ajak anena liasü, aser tang asentenshir maneni amalitepa inyaktsü bangjemer.

Arogo lenirtemi ashiba agi, linük ana nungi Arogo tsüngda amalitepa inyakba ya kanga tongtibang, kechiyong 1905 küm nungi 1945 küm tashi Japan-i Korea atsünga agiba ajanga tang tashi Korea nung karibo Japan nung dang jashir.

Taküm April ita nunga Korea nung Khristan telok kati 'taitoktepba aser yimjung' omen nung ajemdaker Japan nung yimti aika semdanga liasü.

Tongti putiri, "Tang mezüng putirtem telongjem senden menogo aser iba ya ajanga linük anati oshi balala jembiaka Tsüngrem tenüng nung ka dang asütsü aser yaritepa telungjem nung alitsü imlar," ta metetdaksü.

Bishop Abella-i, Incheon Arogoi par Arogo nung tenzüksü atema putirtem yokba atema pelar, ta lemsatep.

May 24-27 anogotem nunga Kyoto Arogo nungi Bishop Paul Yoshinao Otsuka leniba nung Japan nung putir 10-i South Korea kübok Jeju Arogo semdanga liasü.

Parnoki Jeju Arogo office tem semdang aser sarasadem sentong ka nung dena liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rapir**

(n) tebur mesüra tetsür lembuyim dang ajaba ( legitimate person for marriage)

\* Lanurtemi pei rapir meteta kibalembutsüla.

**Rapitsür**

(n) tebuti tanabenbuba agiba kinungtsü (step mother)

\* Rapitsür karibo tangar chirtema kanga meimer.

**OLONG PAITEP # 6546**

	1			2		3		4
5						6		
7			8					
						9		
		10						
11								12
				13				
				14				
15								

**TIPIEN**

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

**LANGTSÜNGLEN**

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

**OLONG PAITEP # 6545 TELANGZÜBA**

**TIPIEN :**

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Sүjak, 10. Aonung,
- 11. Dokan,
- 13. Tinu.



**ALOKBA O WARAKLA NA TZÜMAR YOKYAYOKJIR NEM ASHIOKTSÜ :**

- Master Warakla** : Kwa, nenata jungasa lir südito?
- Warakla** : Aeeet, oda kanga junga lirko, taoba hopta to tzümar katu, kechisarna tashitak ajak ajungera ta mozü ka yokyonga aruba ibaji neko künaprong chia tang tajungba ati.
- Master Alokba** : Nia reprangdangdi kwajo.
- Master** : Ya ati he, techinütsüka menemdarya koda!
- Master** : Haeet, yabo tanga kecha masü Hajmola menüngsar ayokba ya, ashioktsüogo. Sen kwi agi ali?
- Warakla** : Sen meyrjang kasür noklang tenet meshiba küna ket nung noklang tenet ang liasüji, kecha masüar, ni talui meyrjang kaji abeni aruja ta shiogo.
- Master** : Mekümteta, nena ya Kanga mejungi ashioktsüogo, iba Hajmola ya sen metsü jenjang tablet menüngsar mica nung jungjunga packing sür ayokdang kanga mejungi ashioktsüogono, iba powder ya gas form asü dang terara menakashi tali chira gastric kangshitsüa no. Ano ya metetang, sen metsü jenjang nung nenati sen noklang tenet agütsürji iba tzümarbarji kodanga marutsü. Tzümar yokyayokjirtem kodanga tarudaktsüma.
- Warakla** : Hauniii, yasür kümdanglabaaaa!!

- Lilir : WhatsApp

**Assam nung V&AC ketdangsürtemi Lat Mandal ana apu**



**Guwahati, June 14, 2023**

**(Agencies):** Assam nung Directorate of Vigilance and Anti-Corruption ketdangsürtemi Bodbarnü tatalokba balala ana nung Lat Mandal ana puogo.

Tena ya Bhuragaon Revenue Circle, Morigaon nungi Jalaluddin Sheikh aser Nazira Revenue Circle, Sivasagar nungi Diganta Baruah na ta jangjaogo.

Jalaluddin Sheikh-i par kidang Rs 20,000 süpokrem meshia agidang apu.

Lungro yangluba tesem ka lapoktsü atema No Objection Certificate (NOC) agütsütsü atema pai süpokrem meshi.

Iba dak sendakba nung ken o ka benokba sülen DIR VAC Assam ketdangsürtemi Jalaluddin Sheikh aputsü maparen tenzük aser süpokrem meshidang pa apu.

Directorate of Vigilance and Anti-Corruption ketdangsürtemisa Diganta Baruah-i süpokrem meshia agidang apu.

Baruah ya Nazira Revenue Circle nungi Lat Mandal ka lir aser pai trace maps aser landholding number certificates agütsü.

Pa anema ken o benoker ka nungi süpokrem meshia agidang Baruah apu.

Maneni, May 26, 2023 nü Hajo Revenue Circle, Kamrup nungi Lat Mandal ka apu. Iba nisung ya Utpal Kemprai ta jangjaogo aser pa ya Hajo Revenue Circle office nung inyaka liasü.

Utpal Kemprai-i kimung ka indang kulikaket transfer asütsü atema süpokrem meshi aser iba atema pa apu.

Ano, May 29, 2023 nü Vigilance & Anti Corruption ketdangsürtemi Baksa district kübok Circle Inspector, Simla apu.

Iba nisung ya Ganesh Barman ta jangjaogo aser pai nisung ka dang Rs 40,000 süpokrem meshiba atema apu.

**Assam Police-i aket mozü pongdang 95,000 tema apu**

**Guwahati, June 14, 2023**

**(Agencies):** Assam-Tripura arrtsülen Karimganj police-i sen crore aika jenjang aketdang ajemba mozü apu.

Karimganj district nung aket mozü pongdang 95,000 tema apu aser iba dak sendakba nung nisung ana pua lir. Tena ya Bhabesh Kumar

asir Saminur Islam ta jangjaogo.

Osang ka angazükba sülen Karimganj police-i Assam-Tripura arrtsü anasa Churaibari tesem nung truck gari asem sot.

Parnoki truck gari asem reprangdang aket mozü pongdang 95,360 bena aliba

angu. Iba indang jenjang ya sen crore aika asütsü ta asadangtetogo.

"Onoki Churaibari check gate nung truck gari asem sota repranger aket mozü pongdang 95,360 bena aliba apu. Onokisa nisung ana pua lir aser maneni bushisüngdang südar" ta police ketdangsür kati ashi.

**Mizoram nung Meitei nungeri Governor den ajurutep**



**Aizawl, June 14, 2023**

**(Agencies):** June 14 nü Mizoram nung Meitei nungeri teshimtet nübotemi Governor Dr Hari Babu Kambhampati den ajurutep.

Mizoram nung aliba Meitei nungeri YMA, kaketshir lennirtem aser civil societies-i Meitei nungeri yariba atema pelar ta parnoki Governor Dr Hari den senden amendang lemsatep.

Parnokisa Manipur nung tensa tamajung ajuruba atema temulung raksaba olen

lemsatep.

Manipur nung tensa süngjemtsüla aser temaba ketdangpurtemi olemtep ajanga khuret koktettsü atema mepishia metetdaksü.

Manipur nung tensa süngjemtsü atema Mizoram nung Meitei nungeri Governor ajanga India President dangi Memorandum ka yok.

June 12 nü senden amendang NGO Coordination Committee-i Manipur nung lisopurtem pusema sentong ka

agitsü lemtet.

June 23, 2023 nü Governor'er ki "Raj Bhawan" kima nung Solidarity Gathering alitsü aser Mizo nungeri iba sentong pusemstü ayongzüker ta NGO Coordination Committee-i metetdaksüogo.

NGO Coordination Committee nung Central Young Mizo Association, Mizoram Upa Pawl, Mizo Hmeichhe Insuihkawm Pawl, Mizo Zirlai Pawl aser Mizo Students Union teloktem dena lir.

# Ukraine: Odesa nung nisung trok tepsetogo



Ukraine linük kübok Odesa yimti nung Russia nunger temi aonung rocket amshia amakba sülen fast food restaurant ka jakdang gari ka mi agi rongdoker aliba noksa nung angur. Russian sepaitemi aonung Ukraine south tsütsü Odesa yimti nung cruise missiles khaloktsü aser eastern Donetsk region nunga nisung aliba ki kar raksaja nisung trok tepset aser aika yiru ta ashir.

**Kyiv, Aami/June 14 (Agencies):** Russia nunger sepaitemi Ukraine anüolentip nung aliba Odesa yimti nung cruise missiles khalokja Bodhbarnü kitem raksatsüba den nisung trok tepsetogo aser nisung aika yirutsüogo, ta regional ketdangsürtemi metetdaksü.

Ukraine nunger military otongdar kati ashiba agi, Russia nunger sepaitemi tang asendenshir anüing ajanga Ukraine maka arudar. Ukraine nunger sepaitemi Russia nungertemi atsünger aliba tesemtem agitsü asoshi jenjang agiba mapang ka nung Russia-ia meyiper Ukraine kübok tesem balala maka arudar.

Anütoklen Donetsk regional governor Pavlo Kyrlyenko-i Telegram ajanga, missile tem agi ki tenet raksatsüba sülen nisung asem süogo aser Kramatorsk

asere Konstantinovka yimti nung ki aika raksatsüogo, ta ashir.

Odesa nung chiyongtsü ayuba warehouse ka nung inyaker parnok asem asü aser nisung tenet tashi yirua liasü. Iba tesem nung nisung aliba kitem, warehouse ka, dokantem aser cafes downtown raksatsüogo, ta regional administration-i Facebook ajanga metetdaksü. Maneni ki ka nung bomb pokloksüba sülen tanüker aser iba kidang alir nisung trok tashi yirua liasü.

Teküzükertemi ki ajareper alibatem nung taküm alirtem bushia liasü, ta parnokisa metetdaksü.

Black Sea nungi missile tem khaketa yoka iba yimti amakba nung Kalibr cruise missiles pezü densema liasü aser missile asembo air defences-i khadanga liasü, ta

administration-i ashir.

Ukraine indang General Staff otongdar Andriy Kovalov-i agi, Russia nunger sepaitemi missile amshia Ukraine tali amak tenzükogo.

Pai ashiba agi, Odesa tesem dak alia Kharkiv, Donetsk aser Kirovohrad tesem temeket ya Kh-22 cruise missiles, sea-launched Kalibr cruise missiles, aser Iran nung yangluba Shahed drone amshia amak. Missile tekubo khadangogo.

Kovalov-isa, Ukraine nunger sepaitemi tesem aika nung km 1000 shibo atsüngaogo aser eastern Donetsk region kübok tesem ana nung maneni raradar. Russia-i Ukraine litsü pongusü nung kabo atsünger lir.

Kasa mapang nung Kryvyi Rih yimti mayor-i ashiba agi, Mongolbarnü Russia nungeri apartment ki ka amakba nung asür nisung 12 jungogo.

# Qin Gang-i China inyakyim nung minprong masütsü ashir

**Beijing, Aami/June 14 (Agencies):** China indang Foreign Minister Qin Gang-i, Antony Blinken den phone ajanga jembiba mapang United States dang China inyakyim nung mejungshitsü asoshi mepeshia metetdaksüogo. Anogo ishika tsünga US secretary of state-i Beijing semdaksü akok ta bilema aliba mapang ka nung tang iba olen ya lemsatepogo.

Qin-i Blinken dang, Taiwan ken o amala China-i kanga süoki ia agiba ken o akümtsübutüsü aser China telung ken o nung mejungshitsü aser China sovereignty, security aser terenlok maparen balala nung minprong masütsü atema metetdaksüogo, ta China foreign ministry sangdong ka ajanga Bodhbarnü metetdaksü.

Kasa mapang nung Blinken-i, mangatettep adokba nungi jenboa alitsü atema tongtepratep tajungba asütsü nungdakba lemsatepba den US-i maneni tebilemtsü aliba ken o tem ashishitsü aser kasa mapang nung China den

sendaktepa inyaksü asoshi jenjang agitsü, ta shiogo, ta State Department-i metetdaksü.

Blinken-i Beijing semdangra iba ya küm pongu tsünga US nungi tongtibang ketdangsür kati China semdangba mezüngbuba asütsü aser US tir Joe Biden indang administration nungi tongtibang lenir kati mezügbuba semdangba asütsü. Taiwan nungi tenzüka shishilembaba aser spy balloon tem dak sendakba nung Washington aser Beijing na tawa mangatettep adoka arudar.

Blinken-i China semdangtsüba indang Chinese foreign ministry-i tang tashi osang agüja mali, ajisüaka taoba Hokolbarnü US ketdangsür kati osang tejangja magütsüi Blinken-i June 18 nü Beijing semdangtsü ta ashir.

Pai February ita China semdangtsü liasü ajisüaka China indang spy balloon tem asütsü ta temulung melemba balloon tem US kübok tesem balala nung ngua khazüka yokba sülen tensa

mejungsi aküm aser iba sentong thinena liasü.

Iba sülen ketdangsütem ajuruteptsü atema China-i magizüki arudar, ajisüaka taoba hopta assistant US secretary of state for East Asian and Pacific Affairs Daniel Kritenbrink-i Beijing semdangogo, koba balloon dak sendakba tatalokba sülen US nunger ketdangsür kati China semdangba mezüngbuba liasü.

Kasa mapang nung taoba House Speaker Nancy Pelosi densema US nunger yimden yimsüsürtemi Taiwan semdangba sülen linük ana tsünga tesendaktep tamajungba kümshi. Pelosi-i iba asetkong semdangba sülen China-i iba asetkong meketa military exercise tulu ka ayongzüka agiogo, kechiyong iba asetkong ya parnok meyong aser nungdak dang süra tashi yim agi agitsü ta China-i shia arudar.

China-isa, April ita House Speaker Kevin McCarthy aser Taiwanese tir Tsai Ing-wen na California nung ajurutepba aitsüogo.

# Taiwan Foreign Minister-i Europe teyari meshi

**Prague, Aami/June 14 (Agencies):** Taiwan foreign minister Joseph Wu-i Czech yimtiba Prague semdangogo aser China den lemsatepba Taiwan Strait nung yimjung bener arutsü asoshi Europe teyari meshia liasü.

"Taiwan tashi ita aser renema alitsü atema aser status quo maneni benoktsü asoshi tasü ita alitsü atema onoki Europe nung tembartem teyari nungdaker," ta Wu-i Prague nung conference ka nung jembiba mapang ashir.

Foreign minister ya iba European Union kübok aliba linük nung Czech Senate tir Milos Vystrcil den senden ka amentsü atema oa liasü.

Vystrcil-i par linük aser Taiwan na tsünga tesendaktep yanglutsü atema taoba küm ishika merangdanga arudar.

Czech Republic aser Taiwan na tang tashi nung diplomatic tesendaktep kecha mali.

Czech Republic nung centre-right sorkari 2021 küm nungi yimsü süa arudar aser tir Petr Pavel shibai March ita mapa agizüka liasü, pai Taipei den tesendaktep tajungba küma yanglushitsü atema tejangraba lir.

Wu ya Bodhbarnü Brussels-i aotsü, kong pa EU ketdangsürtem den ajuruteptsü, ta Reuters news agency sangdong ka ajanga metetdaksü.

Ajisüaka Wu-i Europe semdangba ajanga China kanga mepelar, kechiyong Beijing-i Taiwan ya parnok meyong ta shia arudar.

European affairs atema China indang director-general Wang Lutong-i ashiba agi, Taiwan ken o ya China indang ken o ajak rongnung tongtibangtuba ka lir.

"Onoki Europe nung aliba linüktem dang Taiwan nüjiso atema inyakyim nem kecha sabang magütsütsü mepeshir," ta pai tweet asü.

Taiwan ya Vatican dak alaka tanga Europe nung aliba linüktem den formal diplomatic tesendaktep kecha mali.

Saka parnok Central aser Eastern European linük aika den tesendaktep lir. Item linüktem yagi Taiwan nem teyari agütsüner; talisa Russia-i Ukraine amak tenzükba sülen parnoki teyari sayuner.

Taiwan Strait nung yimjung benoktsü atema EU lenirtem karibo parnoki Taiwan pusemba lemsatepogo. April ita EU indang foreign policy tekolakba Josep Borrell-i France indang Le Journal du Dimanche dang EU linüktemi patrol asütsü atema Taiwan Strait-i warship yoktsüla ta ashir.

Taoba küm November ita European Parliament züngsemtemia China-i Taiwan Strait nung tashiyim amshia inyaksangshiba aitsütsü atema bangzüng ka pusema liasü.

Taoba ita Al Jazeera den sensaksemba mapang EU aser Belgium nung Taipei Representative Office tekolakba Remus Li-Kuo Chen-i ashiba agi, küm ishika tsünga EU den Taiwan tesendaktep tajungba küma odar aser talisa Ukraine nung rara tenzükba aser wara pokteta süshiba sülen rongsenketzüng dak sendakba nung tetsükdaksü adokba sülen tesendaktep tajungba kümдар.

Paisa, EU aser United States na tsünga transatlantic partnership tashi tait ka ajanga Taiwan dena ajangzüktsü, ta ashir.

"Taiwan Strait nung yimjung benoktsü atema Europe aser US na tsünga telungjem nungdaker. Telok anapronglai Taiwan pusemba sayuogo ajisüaka sayuba yimya balala maneni lir," ta pai ashir.

"Ajisüaka longjemmer inyaksangshiba ajanga China nem osang tejangja ka agütsütsü ta parnoki meteta lir," ta paisa shisem.



Islamabad, June 14: Pakistan south tsütsü Sindh province kübok Thatta district nung angopur indang rong anentena aliba noksa nung angur. Cyclone Biparjoy arutsü lia Pakistan tzükumlen alir nisung 100,000 dak tema parnok aliba tesem nungi anizüker aotsü, ta National Disaster Management Authority (NDMA) chairman Inam Haider Malik-i metetdaksü.

# Olympic Day June 24 nü amungtsü



**OLYMPIC DAY**

**OLYMPIC DAY RUN 2023**

1<sup>ST</sup> PRIZE - ₹ 2500  
2<sup>ND</sup> PRIZE - ₹ 1500  
3<sup>RD</sup> PRIZE - ₹ 1000  
4<sup>TH</sup> PRIZE - ₹ 800  
5<sup>TH</sup> PRIZE - ₹ 500

ORGANISED BY

**JUNE 24<sup>TH</sup> | TIME : 9:00 AM ONWARDS**

18<sup>TH</sup> JUNE 2023, LAST DATE FOR REGISTRATION

VENUE : INDIRA GANDHI STADIUM, KOHIMA

SCAN TO REGISTER

**Dimapur, Aami/June 14 (TYO):** Nagaland Olympic Association (NOA)-i sangdong ka ajanga June 24 nü Indira Gandhi Stadium, Kohima nung alima ajung den jangyu medema Olympic Day amungtsü sentong aliba metetdaksüogo.

Iba sentong ya "Let's Move" Learn, Discover, together for a better world omen nung ajemdaker amungtsü.

Iba anogo item asemtepba tetoktepba ayongziika agitsü:

- 30 Meters: küm 4 aser tema - küm 6 tekübok (2017 June 1 sülen asortem)
  - 50 Meters: küm 6 aser tema - küm 9 tekübok (2014 June 1 sülen asortem)
  - 80 Meters: küm 9 aser tema - küm 13 tekübok (2010 June 1 sülen asortem)
  - 100 Meters: küm 13 aser tema - küm 16 tekübok (2007 June 1 sülen asortem)
- Asemtepba nung shilem

agirtem nem June 24 nü 8 nungi 8:30 ako tashi nung IG Stadium, Kohima nung Bib number agütsüsü. Tetoktepba ya 9:00 nungi tenzüksü aser iba sentong nung shilem agir ajak nem refreshments agütsüsü.

Sentong nung shilem agitsüpurtem ajak June 24 nü 08:00 nungbo Indira Gandhi Stadium, Kohima tonger alitsü mepeshia metetdaksüogo.

Iba sentong nung shilem agitsü atema tenüng züngoksemba inyakyim tenzüokogo aser arishi küm 4 nungi 16 tsüngda alir tejangrartem ajaki shilem agitetsü. Tetoktepba nung shilem agitsü asoshi taa kecha magitsü aser tenüng züngoksemtsü atema tatembangbuba anogoji June 18 asütsü.

Asemtepba nung takok angurtem nem senpet ajak senteper sen 50,400 den Nagaland Olympic Association-

i kuli kaket agütsüsü, ta NAO-i metetdaksü. Maneni shilem agir ajak nem International Olympic Committee-i kuli kaket agütsüsü.

**Senpettem yamai alitsü:**

- 1st Prize - Rs 2500
- 2nd Prize - Rs 1500
- 3rd Prize - Rs 1000
- 4th Prize - Rs 800
- 5th Prize - Rs 500

Tejangrartem shirnok tang tashi tenüng mezüngoksemi lir parnoki tatembangbuba anogo matong tsüngda NOA office, Kohima semdangtetsü mesüra online nung at <https://forms.gle/CkuLsBhyQGyHxWrT6> ajanga mesüra teküboklen agüja aliba QR code amshia tenüng züngoksemteptsü.

Maneni shilem agir ajak dangi confirmation call ka aser sentong indang osang June 23 nü nikongtsüsü yoktsü.

Shilem agitsü pur shirnoki June 18 tashi nung züngoksemogo parnok dang June 23 nü call marura ketdangsurtem den tongteprateptsü asoshi metetdaksüogo.

Iba sentong dak sendakba nung osang tejangjaba agitsü atema Nagaland Olympic Association, Kohima den item number ajanga tongteprateptsü:

1. Mr. NeivikuolieKhatsu - +91-8259-023-640
2. Ms. Kajiloni Krichena - +91-7085-333-972.

Maneni Nagaland Olympic Association (NOA)-isa iba sentong nung shilem agitsü asoshi tejangrartem ajak pelashishia jaokba metetdaksüogo.

## WFI Elections July 6 nü agitsü; Kasa anogo result sangdongtsü

**Aami/June 14, 2023 (Agencies):** Wrestling Federation of India election July 6 nü agitsü ta returning officer-i sangdong ka ajanga metetdaksüogo.

Indian Olympic Association (IOA)-i retired high court judge Mahesh Mittal Kumar returning officer asütsü shimba sülen election agitsüba anogo sangdonggo.

Kasa sangdong ajangsa election indang result kasa anogo sangdongtsü ta metetdaksüogo.

Electoral college tentetsü atema state aser union territory ajak nungi nomination anana agizüksü asoshi tatembangbuba anogoji June 19 asütsü aser scrutiny June 22 nü tembangtsü.

State unit shia-i representatives anana yoktetsü aser representative shia vote kaka asütsü. Anungji WFI elections atema electoral

college nung vote 50 alitsü. Ajisüaka osang ajanga ashiba agi, taoba mapang WFI-i loksatsüba state lokti tentet kari parnoka iba election nung shilem agitsü atema takhangba agitsüogo.

Returning office-i representatives tem kanga junga asadanga sülen shibai vote agütsütettsü aji telemteba agitsü.

Election atema nomination tem June 23 nü nungi benok tenzüksü aser June 25 nü tembangtsü, iba sülen nominations tem sayatsü aser nomination papers tem June 28 nü asadangtsü.

Candidate temi parnok indang nomination tem June 28 nungi July 1 nü tashi nung agintetsü aser iba sülen candidate tem indang tatembangbuba list July 2 nü sangdongtsü.

Mongolbarnü returning office-i sangdong ka ajanga,

"electoral college tentetsü atema State/UT shia nungi nominations anana agizüksü asoshi tatembangbuba anogoji June 19 nü nikongtsüsü 5:00 ako tashi asütsü. W.F.I constitution aser Ministry of Youth and Sports, Govt. of India guidelines kübok aliba states/UT indang Wrestling Federations tem dang nisung anana nominate asütsü ayongzüker. Nisung ana ya executive body nung züngsem asütsüla," ta ashi.

"Nomination ya pei Federation indang Tir aser General Secretary-i sign sür alitsü nungdaker aser June 19 nü 5:00 ako tashi nungbosa benoktsüla," ta kasa sangdong ajanga metetdaksü.

WFI election ya president, senior vice-president, vice presidents pezü, secretary-general, treasurer, joint secretary ana aser executive member pongu atema agitsü.

## Jude Bellingham season 6 atema Real Madrid nung denogo

**Aami/June 14, 2023 (Agencies):** Real Madrid-i Bodhbarnü official sangdong ka ajanga Borussia Dortmund nungi Jude Bellingham alizükba sangdonggo. Madrid-i pa den season trok atema tenanzüktepa ka yangluogo.

Bellingham-i Real Madrid nungi asayanüba lemsatepa aruogo aser UEFA Champions League winners Manchester City-i pa nem maangka agütsüba dena magizüki liasü.

"Jude Bellingham transfer asütsü atema Real Madrid CF aser Borussia Dortmund na mulungtepogo, shiba club den season trok tashi sendaktepa alitsü," ta club sangdong ka ajanga metetdaksü.

"Asüng, Brehostibarnü, June 15 12:00 ako nung Real Madrid City nung Real Madrid nungi asayar tasen ka ama Jude Bellingham agizükba sentong agitsü," ta kasa sangdong ajanga metetdaksü.

Osang ajanga ashiba agi, Real Madrid-i Bellingham alizüksü atema USD million 100 dak tema intokogo. Bellingham Dortmund nungi küm asem asaya aser club atema pai temaba jenjang nung

asaya liasü aser iba ajanga Europe nung tanga team temia pa dak tenük yoka liasü. Arishi küm 19 tain asayar ya Dortmund nungi asaya 132 nung asayaogo aser iba mapang pai goal 24 idaktsü aser assist 25 süja liasü.

Bellingham-ia Dortmund aser fan tem den tepila o lemsatepogo aser pai Germany nung asayaba ya kodanga mamatoktsü ta ashi.

"BVB aser fan tem ajak dang taoba küm asem atema kanga pelar. Nenok indang jersey asemtsü ya tetushi tulu liasü. Ni jenjang tasen ka agiaka ni idaki asayaba kodanga mamatoktsü. Tarutsü takok asoshi imlaja atar," ta Jude Bellingham-ia ashi.

Kasa mapang nung Dortmund indang sporting director Sebastian Kehl-ia, pa takok ma nung asayayonga aotsü imlaja ataba lemsatepogo.

"Jude tanur asüba mapang onok den kanga junga renloka ao. Pai tang Real Madrid nung jenjang tasen ka agitsü telemteba agiogo. Pai onok asoshi kechisa ajangzüksüogo iba atema kanga pelar aser tarutsü nung takok nguyonga aotsü imlaja atar," ta pai ashi.

## Indonesia Open: Lakshya Sen tanabuba round-i iogo



**Aami/June 14, 2023 (Agencies):** Commonwealth Games champion India nung badminton asayar Lakshya Sen tang asaya aliba Indonesia Open World Tour Super 1000 event tebur kija asaya nung tanabuba round-i iogo. Pai Bodhbarnü Malaysia nung asayar Zii Jia Lee straight game nung akok.

Lakshya ya world championship bronze medalist ka aser world ranking nung 20buba nung lir aser pai iba asaya 21-17 21-13 agi world no.11 Lee madak takok ngua liasü.

Lakshya tanabuba round nung China nung asayar Lu Guang Zu mesüra külem India nung asayar Kidambi Srikanth den asayatsü.

Tebur kija asaya nungsa India nung asayar Priyanshu Rajawat walkover ka ngua tanabuba round-i iogo. Pa

Thailand nung asayar Kunlavut Vitidsarn den asayatsü liasü.

Ajisüaka Rajawat asoshi tanabuba round ya melarabo masütsü kechiyong pa Denmark nung asayar Hans-Kristian Solberg Vittngus mesüra Indonesia nung second seed asayar Anthony Sinisuka Ginting na rongnung ka den asayatsü.

India nung tebur kija asayartem rongnungi ano HS Prannoy-a tanabuba round-i iogo aser pa Hong Kong nung asayar Angus Ng Ka Long den asayatsü lir.

Kasa mapang nung tetsür kija asaya nung India tsür Aakarshi Kashyap-bo mezüngbuba round nung tsukatokogo.

Kashyap asoshi second seed Korea tsür An Se young kanga jungrara liasü aser lai asaya 10-21 4-21 agi makok.

## BILEMDANGANG

"Ali rongsen agi tenüng tajung malizükteptsü."